

## **Kolosi thofroh gontwat Porr dwandfakhato htafmot**

### *Barkof kfo nuhas mrokfom*

Kolosit, Esia profins korht. Brbo Porr yi tohmo kmi Efesus pno korht nd kmi Kolosit. Nd kmi Kolosit Bro Nkifrarhu sioskfot sinyamohat nhai Porr nd kmi Kolosit yihato sioskfot kasinyarmort. Nhai. Kane ka Porr Efesus yi tohmohat, ka nd yiha Porr wom yimam misin hingrneft kfo tkrurhato hingrna htfasmoahat, ka nd yiha nd kmi Kolosit Bro Nkifrarhu mrokfom kfo pthanimootmm Kolosi thofm wanyhato sioskfot sinyamot.

Nd kmi Kolosit bi sioskfot sinyayett n tfit wom yimam nd kmit yimoamn memoum nd kmithu Kristenm wom nfri nfri mrokfom akfo hta bohtanomm. Porr inji wanyhato ndar gontwat wandfamorm Kolosi Kristenm. Rroh kfo bmtayuk mrokfom wandfamorm. Kfo memorm, “Krais mifrap tamoh tamohroh mfhakort korht. Kraisrpar toh rafohato rorhu mofsinhitn yak htarfornom, wom yimam nhai. Rom yakrfomnom nndo wuri yak htarfomnom. Nhai Kraisr pno brbo wom tohrfotnom.”

Kfo memor, “Kraisrhu tirm pno Bro Nkifrar hingrna hta bohtamorm hefenri bbinysoft rhuyuk shrkam. Kraisr pno frtkafwatnom thu hamuhwornom. Thu hamuhhato nfri yima rifhur niewur. Nfri yima rifhur niewatr tfit tu Kraisrhu duka yima yuhur hikwonom.”

Porr ndar gontwat wandfakmortn Tikikusr hiyafmotr Kolosiko hanymort. Onesimusrpno yimof. Filemonrhu gontwat Porr wandfamot to nd yima Onesimusrhu mrokfotn wakfotuh wakfotuhmour.

## **Kraisrn buriwurm tamoh tamohm. Bro Nkifrar bi rorn thu dbothatmor.**

*(Sapta 1.1-3.4)*

*Kolosim Kraistr yak hik mifmo yuhat*

<sup>1-2</sup> Na Pora, na Kraistr Jisasrhu aposer hingrneft kakitohwa. Tu Bro Nkifrarhu hti fijo nann htihato nd aposer hingrneft fak htamor. Timotir, nmoh Kristen yimater, ror nanpno tohwarn, rorpn ndar gontwat wandfewunonko niko Kolosito hwa Kristenko. Niko Kraistrpno frtkafwa yimako, Bro Yifemr nikmoh rhu nmbuham ayak hta bhta marnya-kahtko be rhu marnyarahko. <sup>3</sup> No kfo bruttnahato nikmoh yufam yuta thombat, nmoh Nungohtet Jisas Kraistrhu Yifemrpno kfo yindhorwo-nonko. <sup>4</sup> Nhai be sfno Bro Nkifrar pno kfo yindhor furakahnonko. Mrokfot wanyakmono kfo memomno, “Kolosi thofm Jisas Kraistr hikwamn Bro Nkifrarhu tuhan yindarim hifa hifa kak marnyewumm.” No inji wanyak-hato Bro Nkifrar pno kfo yindhorwo-nonko. <sup>5</sup> Niko nhai bi nd nefm riyakitohakrmokomm. Hefemr yimam muhato Bro Nkifrar hiruha wusshu mrokfot riwanyakhato Jisas Kraistrhu yafothet gutnius mrokfot riwany yakiowakhato nd nefm

rifakitohak-mokomm. <sup>6</sup> Yimam nd gutnius mrokfot kmi kmi kfo ptha htfasmotmt niko wanyhato rihikakmokomt. Rihikak-motkomt Bro Nkifrar inji htihato fak marnyamorko. Tfit tukomn Bro Nkifrarhu yimam yak marnyewa nmbuhat mhtiyakhato duka memoko, “Dajohmn, gutnius mrokfot tu fipetet.” Nd gutnius mrokfot be bi kmi kmi kitt. Nhai wom kmit rim tohtakaht. Be bi kmi kmi yitatt tuhan yindars wany hanitamn yima yuhum kak kebokt hanitmm nikmoh yima yuhum yak keboktmo kanjo. <sup>7</sup> Bro Nkifrarhu yuhuwaf nmbuhat hifa Epafrasr nikompno tohmoarn kfo nuhas bonuhasmorko. Rorhu hingrneft, awi hifayet. Nom hifa hti yindhhorwonomt ror hingrnewa hingrneft. Ror nmoh yimater. Rorn tkitt yaknihato nd gutnius mrokfot yi kfo ptha nuhasmorko. <sup>8</sup> Mkfo ptha nuhas tanyhato tfit niahato rorn tfit nia kfo ptha nuhasmornom, niko Bro Nkifrarhu Yafothat thu kasinyahato wom riruh arhuyuk Kristenm yak marnyewa yihotam.

*Porr Kolosim kfo bruttnamo yuhat*

<sup>9</sup> No nd Epafrasr kfo nuhasyuk mrokfom wanyomo yiha, no Timotir-pno rikfo bruttnakmononko. No nhai yafhokahnonko. Kangno, “Bro Nkifrar akfo bruttnakahtnonr Kolosithu Kristenko be Bro Nkifrarhu dukef yuhatn hikrahko.” Yo Bro Nkifrarhu Yafothatn tu dborioh riduka aduka yima yuhur hirwattko be nd dborioh dukefrpar brorahrko. <sup>10</sup> Be nd dborioh dukefr broruhatrko Bro Nungothetrhu dukef yuhatn hikruhatko hti yindhhor-rahrko. Niko hingrnayuk hingrnafam nhai finji naruhatm. Be yi marnyarahm. Nikmoh toh

nmbuham be dborioh nefrpam narahko. Nd yuhamn Bro Nkifrar hti duka tungunarahkomr. <sup>11</sup> Bro Nkifrar harhuwa bbuka rifhur nhai be rpahtet bbuka rifhur harhukahr. Nhai. Nndohtet nndohtet bbuka rifhur rorn harhuworr. Ndnatn kangno Bro Nkifrar akfo bruttnakahtnonr nd ror harhuyuk bbuka rifhur hiruhatrko titarahkomm wuruha aruha niayuk krhopam. Tpim habokknaruhatrko nhai wohsisruhatko. Nhai. Tamoh tamoh nefm nhai be bmbri kaht kanjo wakuryakhato huttakniruhatko. Be yindhorhato <sup>12</sup> nikmoh Bro Yifemr yuta yindhorrahkomr. Nd Bro Yifemrn yihotam yak hta bohtamotrm nikmoh yufam bi rorhu rmon swirtn o rorhu rmon rifhutn korhwom. Yufam bi rorhu rmon rifhut ruhetmn nd tamoh tamohm nikmoh yufampno hefenr rhuyukm yakrahkomm. Rpat nd Bro Nkifrarhu nukeft tohet met yindarim-pno rpat yak hanyrahkomm. <sup>13</sup> Nom afo Satanrhu tirtn rhumonon. Tfit Bro Nkifrar yakmornom Jisasrhu tirwafitn wakmbremornom. Turhu marbit rhuyuk Yonrhu tirtn wakmbremornom. <sup>14</sup> Nd Yonr suh nanyormotr Bro Nkifrar inji htihato be nd nmoh fasoh fasoh nefm nhai tfit dukakahrm.

### *Kraisrhu nefmi rorhu hingr nefm*

<sup>15</sup> Kraisr Bro Nkifrarhu yoner. Nda nom hti duha yita Nkifrarhu ruheft, to nd Kraisrn fak nhombramort. Kraisr, Bro Nkifrarhu nkati yonrn, to be rorhu yinhitn rhu bugewum tamoh tamohm. <sup>16</sup> Kraisrhu tirmpno Bro Nkifrar hingrna hta bohtamorm hefenri bbinysoft rhuyuk shrkam. Hefenr rhuyukm nhai htikahnomm,

bbinysofrpathum womm htitnomm. Rorpar hingrnamorm mounmotm, kminysofroh nkifram, gafman yimam, nd ndm rorpar hingrna bugamorm. Memor, “Ahtakahanmn nanhu yinhit tohhato nanhu yima yuhurn hikrahm.” <sup>17</sup> Kraistr bi ruhetrn mounti bbinysoft yorhwa shrkar dborha hanyomor. Nd dborhayuk shrkar rorpar kfiwatr nd shrkar nom htitwa htiyeftn korhwor. Ror kfiwatr tek m yiretm yorhwatm yimanom yiram yakhato kawonom. Ror kfiwatr yimanom wiyauyauwonom. Nd nd nefm o tamoh tamohm inji rhu hikwatm htitwonomm. <sup>18</sup> Kraistr tohhato rorhu sioskfot kasinyahato rmon kimor. Turn rmon bis rhuhato kak hta bohtewurt. Kraistr tor tu barkof yimar bi nohetr tfit sinyamor. Tamoh tamohm rorparhu yufatn nyingako htakfot. <sup>19</sup> Bro Nkifrar bi Jisasrn thu dbothat bugamor. Memor, “Athu dbothatkahtanr be rorn yakrahm nanhu nefm.” <sup>20</sup> Nomi Bro Nkifrar nndo nndo toh hnamohat yo ndar bbinysofthu fasoh rhu beb nm-buhat rhumot Kraistrn yura bgre mis tuhegir-hato rorhu kkut yohnemott Bro Nkifrarhu namburpam Kraistrn hta nohmormn gbhu mtir hnamorr.

<sup>21</sup> Niko afo fasoh nefm yakitohhato yo fasoh dukefmpno rhuhato nhai Bro Nkifrar pno brbo yirmoako. Be inji hti sr thumoukomr. <sup>22</sup> To be hifa Kraistr yura bgre mis nohmor. Inji namotr Bro Nkifrarhu namburpam rorn hta nohmotrm hifa yima yuhur niehato rifak marnyakmornom. Bro Nkifrar duka memor, “Inji anakahta yimaroh yima yuhum tukanhu yima yuhum kindo rhu-ruhamn ee hifa htihato tfit yakruhanm. Yo nhai tfit wom mroketm rhuruhatm.” <sup>23</sup> To nd

dukeftpno, nd niko yakitohwa gutnius mrokfot mirahko yakitoh hrufreh hasohato tfit wom nefmpno amyafhoninomt. Nhai. Nikmoh dukefm nd gutnius mrokfot kfoyuk mrokfo yuhamn duka duka hti yukatoh hasokfot. Na Pora, nann aposer hingrneft myaknihato nd gutnius kmi kmim kfo ptha htfaswonomt.

*Porr sios tohyuk tuhan yindariroh hingrna yimar tohmor*

<sup>24</sup> Ndar yihart na kalabus tohwa. Na yindhorhato kekwanm nanpno niewa krhopam. Nd krhopam Kraistr yakmo krhopam kanjo kekwa. Niko yakyuk krhopam nann tfit kakahukanko. Ndnetann kanga nd Kraistrhu sioskfot yakyuk krhopam nann tfit kak hanyahunam. <sup>25</sup> Bro Nkifrar niko yima tangikmoh duka nmbuhatn na sioshu hingrna yimaya fak htamora. Ndnetann na niko sios tohwa tuhan yindarikmoh hingrna yimaya tohwa. Nann nd hingrneft tohhato nann nd rim hta mhta mrokfem frhik bohikak-hato kfo hik bohik nuhasruhanko. <sup>26</sup> Bingot toh hnamo yimampno nd mrofkot afo fak kafroh hnamort. Ariharn nd kafrohet mrokfot bi tafont htiwatrt Bro Nkifrar hikwa tuhan yindarinom bi htihato wanuknomt. <sup>27</sup> Bro Nkifrar turhu dukeftpno nd kafrohet mrokfot hta nriyaf nuhas-mornom. Nd kafrohet mrokfot inji kfiwut. Yima tangim Bro Nkifrar yukatohhato yak marnyarahrm. Nikompno Kraistr frtkafwa yuhatn hefenr hanyruharko hefenrhu dborioh dborioh rhu nmbuhat hi hanyrahrko. <sup>28</sup> Ndnettn nom aposernom kmi kmiroh tuhan yindars

kfo nuhas buga hanitnomm gutnius mrokfot. Nd gutnius mrokfot kfo ptha nuhas thoft, nom yakitohwa bro duka yima yuhur kfo kangnom, Bro Nkifrarhu hikneft hik marnya bomarnyakfot. Nom kangnom tu dborioh dborioh dukefm-pno nd Bro Nkifrarhu hik yuham akfo hik bohik nuhas marnyakahtnomm, mrokfom yak duka tunguna marnya-rahmm. Yak duka tungunaruhamn Krairpno frtkaf kihruhamn Bro Nkifrar hti marnyarahm. <sup>29</sup> Ndnettn Krair yahuka bbuka rifhurpno aposer hingrneft hingrna nnfiwant.

## 2

### *Toh bmtahato tamoh tamoh nefm niayukm frtfa thukfot*

<sup>1</sup> Na kanga akfo nuhasanko niko nanpno tafi nahti duha Kolosiko, Laodisiako yo niko womko, na niko dukahato yiha yiha kfo bruttna nnfiwa. <sup>2</sup> Na inji hingrna nnfiwohat nanhu yima yuhur duka kangr, niko Bro Nkifrar hikwa tuhan yindariko bi tat yima yuhumpno warhukahkomn tir nayakitohhato rpa yima yuhur bi warhuko. Ndhtet dborioh dukefm wayakkahkomn niko Bro Nkifrar hikwa yihotar nd dborioh dukefmn thu bmta hanyruhatmko nd Bro Nkifrarhu yak kafkoyet mrokfot htirahkomt. Nd kfo kafkoyet mrokfot to nd Krairhu gutnius mrokfoyet. <sup>3</sup> Kristen yima yakitohyuk riduka aduka yima yuhum, mrokfo ptha yafothar, tamoh tamoh dukefr Krairhu gegb yohrn hmbre kafrohetm korhm. Yima Krairpno riyahn, ee susubur nuhashirahrn.

<sup>4</sup> Mrokwom bi wanukwokomm. Wom yimam niahato mkfo wuti bowutitmko, to mirahko bi ariwany yakiowaknomm. <sup>5</sup> To na, na nhai nikompno rpa kmit tohkahnom. Na nndo tohwa. To nanhu htiyefit inji htitant, thatiprpat nndo tohwot, dukefr nikompno korhwor. Hifa nikmoh toheft toh marnyiwakomn Kraistr kakitoh nnuhaknitkomr. Nd ndm wanyakhato yima yuhur yindhworwa.

*Kraistrpno frtkaf mifhato rorhu toheft yakkfot*

<sup>6</sup> Niko bi Nungohtet Jisas Kraistrhu gutniuskfot wanyhato yakitohetko, be Kraistrpno frtkafhato wuyauyaukfot. <sup>7</sup> Miroh nembfam tum wom miroh nembfampno nathu dbkafhato tohwa kanjo nikmoh tohefti wiyauyau nmbuhat inji tohkfot. Nd nom yihato kfo nuhas htfaswa gutniuskfot yakitoh kihhato hik marnyakfot. Nd gutniuskfot hikhato Bro Nkifrar nikompno niwa dborah dborah nefm tfit Bro Nkifrar kfo yindhor boyindhorkfot.

<sup>8</sup> Niko dukefmpno tohkfot. Wom yimam wom nkifra tndhmi mount yorhwa marrhu tndht o gunyrhu tndht o yamthu tndht o bbinysoft yorhwa shrkaroh nkifra tndht hneruhamtn yuwi mkfo tndh nhehruhatmko niko mwany wofnnihato mhikaknirahkomm. Ndhtet yimam nkifram yakitoh hawihnamo nkifra boririfhuti mount yorhwa shrkaroh nkifra tndh mrokwomi bbinysoft yorhwa shrkaroh tndh mrokworpar kakitohwom nhai Jisasr hikhato rorhu dukefr hikkahm.

<sup>9</sup> Bro Nkifrar bi Kraistrn thu dbothat bugamor. Ndnettn niko dukaf hanykfot. <sup>10</sup> Kminysofroh



nkifram bi Krairpar kak wasitrm. Nhai rom mfrfnahniato tfit rom mtokfot mfhako. Nhai. Niko Krairpno frtkafwa yuhatn to be ror hatohyuk yafothar be bi niko mthu nawoh bugamor. <sup>11</sup> Niko Krairpno bi frtkafhato tohwa yuhatn be bi kak hikwokomt tu tha pukthu yuhat. Ndt nhai be thatipthu hingrneft rhukaht. Nhai. Krair nd bingot hatoh hnamo yima yuhu bebm fak thumor. Tot tu tha pukthu yuhathu mrokfo yimbu yuhat. <sup>12</sup> Bi Krairpno nohmokomn rpat sinyamoko. Baftais hingrneftn nd Krair nohhatoh sinyamo hingrneft baftais nuhasmoko. Krair nohhatoh tfit sinyamohat, fitoh yimam duka kangm, Krair nohmohat tfit tu Bro Nkifrarhu bbuka yafotharn tfit kasinyamorr, ndhtet dukeft yakitohet yimam baftais neftpno nd dukefr kak nuhaswomr. Niko to ndhtet dukefr yakitohmotko baftaismoko. <sup>13</sup> Niko ritohakhato toh hawihnamohat tuko rihatohakmo fasoh yima yuhurpno toh hawihnamokomn nhai wom dborioh nefm nahnarmoko. Be nd fasoh nefmn yakitoh hnamokomn bi hel yita yihotar bi tohmoko. Krair sinyamo yuhatn niko tfit nfri yima rifhur thu hmbrehemorko. Nd fasoh fasoh nefm nd yiha Bro Nkifrar mong trohmorm. <sup>14</sup> Be nd nmoh yufam bi kotpepakfot ruhetm Jisasr nohmo bgre misn rpat frdbkafhato rpat nd kotkfot minohnimot. <sup>15</sup> Krair bgre mis nohmo tkittn Bro Nkifrar yimaroh nyingatikhatoh tafontn nda kminysofm yo nkifra yarhm hatohmo nungrajoh bbuka rifhum fahot nohmorm.

*Bi Krairpno nohmonom. Nhai tfit nkifra tfha*

*mntwatn yakhta marnyaruhattt nmoh rhu nmbuhat*

<sup>16</sup> Mirahr wom yimar mrokfot hnehato yemoroh ye hik yuham, yo Judaroh bro yiharoh rhu hik yuham, yo nfri yamroh mfnah yiharoh yemro burwa hta yuham yo Sabat yiharoh rhu krna yuham, nd nd nkifra yirmoht tfit amhfnahneyant. <sup>17</sup> Nd nefm nkifram yakitoh hik hnamom rom nkifra yirmoht yakitohetmn fak hik hnamomt. Rom yakitoh hnehato bi romn hanohnimomt. Nom yonnom tfit nd nkifra nefm yakitoh duha. Nom Kraistr hingrnamo hingr nef yuhatn tfit hikkfot. <sup>18</sup> Wom yimam niahato kfo rafo kangmko, “Tamoh tamoh yeshri-roh ye kars yuham kfiwunomko yo kfo kars mrokfom kahukwonomko, hikkfot. Hikhato mounmotmn kfo bruttnakfot.” Rom kfoyuk tng yuhat hikrahko to be nd Bro Nkifrar hiruha hifa rhu nmbuhat nhai yakruhatkomt. Ndhtet dukefm nd yimam kfiwam, be nd hwe tweh hanyhato yekwa mrokfomn kfo nuhaswomko. Be turoh tuhagrha yima yuhumn nd mrokfom kfiwumm. <sup>19</sup> Nhai romn Kraistrpno frtkafkahn. Nhai. Nomn Kraistrpno frtkafwatnom ror hatohewornom. Nom sioshu tuhan yindarinom rorn nmoh yima mrokfo rifuher. Rorn kak htaf bohtaf hanitnom. Ndetnomn rpat nayakitohwanomn Bro Nkifrarhu dukef yuharn hik hanitnom.

<sup>20</sup> Niko bi Kraistrpno nohhato nkifra tahi rmonroh nkifra boririfhut bi minoh nhehafetko. To tfit tamohmpno tfit nd nkifra boririfhut yakitohwako? To tamohmpno kfo boririfhu yamukako, <sup>21</sup> “Hnaru yemrom tire yakti duha yo ye siwon

duha.” Tamohmpno kfo kars mrokfom hikwako? <sup>22</sup> Mirahko ndhtet kfo kars mrokfom ahiknom. Ndhtet hnaru yemrom tng yuhat yiyefiwam nhai yihom rhukahm. Yihom fnahnitm. Be yimamn ndhtet yemro ye kars mrokfom mhfnahnewumm. <sup>23</sup> Yimam to ndhtet yemro ye kars nmbuham ye hikwamn kangm ka tot tu dborioh neft. Kangm, “Ka nd yemro ye kars yuhamn hikhato nd fasoh yima yuhur minoh hmbrenirahr.” Ndnnetmn mounmotm kfo tatewamn, yima yuhum yak karhuhato turoh thatipm tmbho wok bowokwomm. Kangm, “Ka nd yuham inji anakahnomn ka nd fasoh yima yuhur minoh hmbrenirahr.” Nhai mif.

### 3

#### *Bi Krairpno rpat sinyamonom*

<sup>1</sup> Niko bi Krairpno rpatn Bro Nkifrar kasinyamorko. Ndnnetn nikmoh yima yuhum be hefenko rhuyuk shrkamn nikmoh yima yuhum duka duka rhu hasokfot. Hefenrn Bro Nkifrarhu tirmifko Krair mrhumor. Bro yufa yekwa mkuko mrhuhato kingroh gajis yakmorn korhr. <sup>2-3</sup> Niko bi nohmoko. Tfit Krairsn nfri yafothat thu hmbrehato be rorpno rim tohmoko. Krairpno rim tkafhato to be Bro Nkifrar rpat Krairpno rpatn toh natwihworko. Ndnnetn yiha yiha hefenr rhuyuk shrkar duka duka rhu hasokfot. Mirahko ndar bbinysoft rhuyuk tamoh tamohroh dukefrn be arhu hasonom. <sup>4</sup> Nikmoh rhu nmbuhathu rhu hik hanyuk yihotam Krairsn harhuwort mnat. Ror tafont miyak nriyafhato tuhant yindars tafont hti thombat rorpno tafont

rpat toh bugarahko. Rorpno rpat tafont tohhato rorpno rpat fnhu bugarahko bruwohmr katiwa kanjo.

## **Kraisr thu hamuhwatrnom nfri yima rifhur mfnahnewur**

*(Sapta 3.5–4.18)*

### *Nfri yima rifhurhu nefm*

<sup>5</sup> Niko to bi Kraisrpno rpat nohmoko, nd-netkomn mirahko tfit nd fasoh fasoh nefm tfit ayakitohnomm. Nda bbinysofthu fasoh fasoh dukefm niko hatohwam yafho buga mifkfot. Na kfiwa fasoh fasoh nefm, to kfiwa nd met yindarim nayak kafroh htfaswa nefm, yo yima yuhum wab-bra sinyekwa nefm, yo nyinga nnwihnefm, yo maruha dukefr. Nd maruha dukefm yorhwammn nhai Bro Nkifrar dukakahmr. <sup>6</sup> Mirahko inji ananom. Yimam inji niwam, Bro Nkifrar nam-burrahmr. <sup>7</sup> Niko tafi Bro Nkifrarhu mrokfot hik duhakomn afo ndhtet nefm fakitoh hnamokomm.

<sup>8-9</sup> To tfit arihat, namburneft, nd yima yuhum kahm kanjo wakuryak-hato womm kfo huttnefm, womm be hifa nyingar hta duha, womm faso faso kfo rindho borindhohato faso faso kfo dbotna inji nanefm yo womroh kfo fura nhehneft, nd bugam be yafho thu bugakfot. Nd fasoh yatk yima yuhu bebr bi fafhomokomr. <sup>10</sup> Bi Bro Nkifrar nd dmbt rhumot bi frwus bowusmortn yima rifhum bi wutha-yemko. Yiha yiha nfri nfri dukefm hi hanitrko. Nfri dukefm yahukatrko nikmoh yima rifhur turhur kanjo korhr. <sup>11</sup> Nom frohnom bi mar nukeft bi ruhetnom, to nhai tfit tunom yak nhtahato Judam rom tum watohko yo yima

tangim rom tum inji watohko, tha puketm rom inji tha puk duhatm rom inji, wom mreht pthayetm rom inji, yo tahi muhm tohetm rom inji, slefm rom inji yo yima furam rom inji. Nhai tunom tfit inji yak nhta kfo nhtakfot. Nhai. Kraistr thu hamuh nhombra bugewurnom yima yima buganom. Nd-netnomn nom bi Kraistr-parhu yima bugayenom.

*Wommpno nayak marnyahato rpa yima yuhurhu toh nmbuhatn yakkfot*

<sup>12</sup> Niko bi Bro Nkifrar yakmorko bi rorhu yufatn korhko. Rorhu dukefr nikomn korhr. Ndnettn niko womroh hti yuhuwa nmbuhat yakkfot. Hifa hifa yima yuhum womm hmbrekfot. Nikmoh yufam yura yura hta duha. Nikmoh ruhefm, pthefm, ptha yima boyimakfot. Womm finji tamohm fak nhehmkon o finji newumko, niko be mirahko yima yuhum wakur sinyahato finji anakninom. Mrokfo ptha duha be rhuhato nyingarpaye yukatohkfot. <sup>13</sup> Nikmoh wom frohr wom Kristenmn tamohm fak nhehmr o finji nemr, mirahr nd yimar be sinyahato finji anaya. Be hifa yima yuhurn nd yimam nayuk nefm yafhokfot. Mirahr rhuhato nd womm nayuk nefm akfo nam-buranm. Nmoh Nungothetr nmoh fasoh nefm yafhomo kanjo womm nayuk nefm yafhokfot. <sup>14</sup> Nd na bi kfo hne mrokfom rom inji kfone hanitanm. To ndmpno yakitohyuk wom bro nmbuhat kfiwanko wom yimaroh yak marnya nmbuhat. Tuko Kristenko tir nayakitohhato tawo tawo nayak marnya nayak marnyakfot. Inji narahko, to be nd tkittn tuko nahti dukaruhakomn be nd yiha tir riniyakitohakrahko. Yo Bro Nkifrar kfo yindhorkfot.

<sup>15</sup> Kraistr nd dukeftn fakmorko. Ndnettn nd tir nayakitohneft yakitohkahkomtn nd dukefrn yak htarahrm nikmoh rhu nmbuham. <sup>16</sup> Kraistrhu tu dborioh mrokfom mfhat htakfot. Niko rpa rpa yimako wom wom Kristen yimampno yi rhuhato dborioh dborioh dukefmpno nakfo hta bohta marnyakfot. Niko Bro Nkifrar kfo yindhohato Windoh Gonborngthu windohm yo nd Bro Nkifrarhu windoh furam, nd nd windohm windohkfot. <sup>17</sup> Nikmoh tamoh tamoh mrokfom, tamoh tamoh hingrnefm, yo tamoh tamoh nef bugam niko nayukm, Nungohtet Jisasrhu yufarpatpno na bugakfot. Yo rorhu yufarpatpno Bro Yifemr kfo yindhorkfot.

*Kristen ripharoh toh nmbuhat Porr kfo pthamor*

<sup>18</sup> Niko metko, niko be yindariroh yinhitn rhuhato rroh tngm hikkfot. Tot tu dborioh nmbuhat. Bror ndhtet neft hti yindhorwort. <sup>19</sup> Yo niko yindariko tukmoh metm marbitn htakfot. Mirahko faso faso ayak beb bobebnomm.

<sup>20</sup> Yo niko yonko, yifammam tamoh tamohm kfiwumko, hanyjborna duha. Be rroh tng yuhamn hikkfot. Tot tu dborioh nmbuhat. Ndhtet neft Bro Nkifrar hti yindhorwort. <sup>21</sup> Yo niko yifemroko mirahko yonm fasoh nmbuhat ayak nuhasnomm. Inji narahko, to be rroh yima yuhum krhorahmm.

*Tohakmi hingrna yimaroh mrokfom Porr kfo pthamor*

<sup>22</sup> Niko hingrna yimako, niko tukmoh tohak yimaroh tng yuhamn hingrna hikkfot. Mirahko be rroh yima yuhuroh yak marnya nmbuhatn rroh

nyingahato tamoh tamoh hingrnefm ahingrna marnya bomarnyanomm. Nikmoh dukefm Bror duka yanhohato be dborioh hingrna yihotam hingrna-kfot. <sup>23</sup> Tamoh tamoh hingrnefm hingrnewukon o tamoh tamoh nefm newuko, yima dukefmpno hingrnakfot. Nd hingrnefm nhai be nikomn fitha yakrmokomm. Bror kahukrko nd hingrnefm. Ndnetkomn hingrna hik marnyakfot. <sup>24</sup> Tu Bro Kraistr kukatoh-worm niko niwa nefm yo hingrniwa hingrnefm. Kto rorn ttha hanyrahrko. Nd nmbuhat bi wanyeteko. Nd bi hta nhombret wuskam yakruharn ttha nhombra hanyrahrko. <sup>25</sup> Bro Nkifrar kotkfot yakitoh thombat, nhai nddoh nddoh kotkfot yimam tohruhatm. Nhai. Rpa kotkforpat yima bugam toh bugarahm. Nd bro yufet yimam finji nem, bro namburet yimam finji nem, nd yima furam finji nem, rpa kot-kforpat toh bugahato krhopam he buga hanyrahm.

## 4

<sup>1</sup> Niko hingrna yimaroh tohak yimako, niko tu hifa dborioh nefm hingrna yimam yak nuhaskfot. Niko dukaf hanykfot nikmoh tohak yimar to yura hefenr tohwor.

### *Kfo bruttnanefti yau marnyaneft*

<sup>2</sup> Kfo bruttnaneft yafho thu duha. Yihof href kfo bruttna hasokfot. Duka yima yuhum Bro Nkifrarpar yi bugahato duka hik bohik buga, ee, kfo bruttna-kfot. Kfo bruttnahato Bro Nkifrar kfo yindhorkfot. <sup>3</sup> Nmoh hingrna nmbuham ndm kfo bruttnakfot. Bro Nkifrar wakfo bruttnakahtkomr Kraistrhu mrokmom kfo pthayuk yihotam yak hta

bohtarahrn. Nd Kraisorhu kafrohet mrokfot rhu-  
moat, be tafont kfo ptharuhatnomt tuhant yin-  
dars wanyrahmt. Na nd nmbuhatpno yakmoma  
kalabus htamoma. <sup>4</sup> Wakfo bruttnakahtkma nd  
kafrohet mrokfeft tu Bro Nkifrar dukewa dukef  
yuhatn kfo hikrhotant wany hik bohikrahmt.

<sup>5</sup> Kristennom tohwa tkitm tom Jisasrhu  
mrokfom hik duha yimam tom rpat tohwonom,  
ndnettn nikmoh tamoh mrokfo pthaneftm  
ptha marnya-kfot o toh nmbuham be dborioh  
dukefmpno toh marnyakfot. Nd Jisasr hik  
duha yimam nikmoh pthefm o toh nmbuham  
mhtiyakruhamn Jisasr mhikaknirahmr. <sup>6</sup> Tamoh  
tamoh mrokfom niko pthayukm be dborioh  
mrokfom pthakfot. Mrokfom be kfo yima boyima  
marnyakfot.

*Porr kfo tkrurmotr f Tikikus Onesimusrof yimof  
Kolosiko*

<sup>7</sup> Tikikusrn kfo nuhas hik bohik-rahrko na hin-  
grnewa hingrna yuharoh mrokfom. Tikikusr  
nmoh nanyama kmi thofer. Nmoh Nungohtet  
Jisasrhu hingrneft rorpno rpat hingrnewunomt.  
Rorhu hingrneft, awi, hifa. <sup>8</sup> Nmoh toh nmbuhat  
asha tohwat rorpno wawanyswako. Ror niahato  
kfo bmta mrokfom kfo hirahrko. <sup>9</sup> Nikmoh kmi  
thof Onesimusrpno rpat nierahf. Onesimusr nhaf  
nmoh dborioh yimatemer. Nompno rpat tohwor.  
Rofn kfo nuhas hik bohikrahfko nmoh toh nm-  
buhat yo nompno yorhwa nefm.

*Porr kfo yindhor mrokfot Kolosimpno yimot*

<sup>10</sup> Aristarkusr nanpno rpat kalabus tohwonom.  
Ror dukewarko kfo yindhor mrokfot htefiwurt.



Yo Makr, Barna-basrhu rahemr, ror to rpat to-hwanomn rorn wom kfo yindhor mrokfot htefiwurt. Fitoh yiha Makr nikmoha niewur, na kfomo yuhatn wahikkah-komn wayindhoraktwakomr.

<sup>11</sup> Yo Jisasr, wom yufat kutewumr Jastasr, rorn nhaf wom kfo yindhor mrokfot htefiwurt. Juda yimam na hinger-na-nuhiwam, to nd nd yimarpam hinger-nanuhiwuma. Bro Nkifrarhu yinhit tohwa yuhathu mrokfot, hifa nd nd yimampno kfo nuhas hanitnomt kmi kmim.

<sup>12</sup> Nikmoh kmi thof Epafrasrn wom kfo yindhor mrokfot htefiwurt. To nd Epafrasrn tor niko hinger-nanuhiwa yimatr. Yiha yiha nd yimar nikmoh yufam yutewarko kfo bruttnewur. Nhai wom yihar rhu furakahrr. Kangr, “Bro Nkifrar akfo bruttnakahtanr, rroh Kristen toh nmbuhat toh bmtaruhamn mirahm nko fitoh dfikrhof Kristenem.”

<sup>13</sup> Ror niko dukewarn yihof href yihof href kfo bruttna hasiwurko. Niko duka, yo Laodisiathu Kristenm duka, yo Hierapolishu Kristenm duka, nhai rhu witakahr kfo bruttnaneft. <sup>14</sup> Yo nmoh yimatem Lukr, nd dokta hingerneft yakitohwar, rori Demasr wom kfo yindhor mrokfot htefiwurt.

<sup>15</sup> Na tukanhu kfo yindhor mrokfot wakfohitwokma Laodisiat tohwa Kristenmpno. Yo wom kfo yindhor mrokfot wakfohitwokma Nimfati rothu kunys yi rifinywa Kristenmpno. <sup>16</sup> Niko Kolosi thofko ndar gontwat waritimnikahkomt tfit Laodisia thofm wahekahtko rroh sios ritimrahmt. Yo Laodisiathu yufatpno yiyuk gontwat Laodisiathu sios aritimnikahmt n tfit Kolosi thofm ahekahtm rroh sios ritimrahmt. <sup>17</sup> Arkipusruhet ndar mrokfo nmbuhat. “Ni Arkipuse, ni Brorpnno

yakmo hingrnafat mirahn amyafhonyant. Nd hingrnafat wayakitoh marnyakahnt wahingrna marnyetwant.”

<sup>18</sup> Na Pora ndar gontwat wandfahato kfo yindhor mrokfot htefiwanko. Mirahko aduka mmonomr na kalabus tohwohat. Bro Nkifrar ayak marnya bomarnyatwarko.

Be injirpa mrokfom.

**Bro Nkifrarhu Mrokfot**  
**The New Testament in the Alamblak language of**  
**Papua New Guinea**  
**Nupela Testamen long tokples Alamblak long Niugini**  
copyright © 2003, 2004 Wycliffe Bible Translators, Inc.

Language: Alamblak

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2011-07-22

---

PDF generated using Haiola and XeLaTeX on 21 Feb 2024 from source files dated 31 Aug 2023

e543742f-8ea0-5b0f-8d98-b42933b0c997